

Pauro Piripos ezektsa bo ziwatahaka

Pauro Piripos ezektsa bo Sesus soho nitsasoko iwaze wastuhu Sesus humo sispirikporētsa niyziknaha. Bykyze sakyriukanikitsa hurukwy eze niapykyrykze sibo ziwatahaka. Deus hyrikoso Pauro tuk niapykyryk iwatahi Deus harere ziwatahaka iwatsahi katsa kino niwatihi Sesus soho humo tanymyryky.

¹ Uta Pauro Timoteo niwatihi ahatsa katsaktsa Sesus Kiristu tsumuēhītsa tsimaha. Timoteo katuk my. Uta Sesus Kiristu tsumuēhītsa ahabo piwatahaka. Ikiahatsa Sesus tuktsa Piripos ezektsa ahabo piwatahaka. Sesus tuktsa sispirikpokotsa sitsumuēhītsitsa kino niwatihi sizubarētsa bo piwatahaka.

² Deus myzo bo mopamykysoko. Sesus Kiristu kino niwatihi iharere bo hyỹ tsimykaranaha. Sibo hi mopamykysoko. Uta hi ispe my:

— O Deus myzo Piripos ezektsa Sesus tuktsa tysipokzitsikta! Ikia humo sakurētsa moziknaha ba paikpa mytsaty zikaha — my. Iwa ahatsyhyryze mykara.

Pauro Piripos ezektsa tsyhyryze Deus bo nipamykysoko.

³ Ahasoho humo mytsaty mykaraze Deus bo mosak-ibaziki:

— O Deus ikia zuba tsamysapyrēta — mykara. ⁴ Deus bo ahatsyhyryze mopamykysokoze kakurēta. Ahazubarētsa tsyhyryze Deus bo mopamykysokoze kakurēta hỹ. ⁵ Hawa tapara tsiktsumuēhĩkĩnaha bo mytsaty mykara. Deus harere ahabo iktsasokoze ikziakbata zuba iharere bo hyỹ tsimykaranaha nawaze tsiktsumuēhĩkĩnaha iwatahi kakurēta hỹ.

⁶ Ikiyahatsa meky watu tsimoziknaha. Deus humo ahamysapyrětsa tsimoziknaha. Iwa ahaturuk mykara hawa mozihikik Deus zikwy humo yhỹ tsimykarana. Aibani zuba Sesus Kiristu myziksizoze hawa Deus mozihikikze mopykba.

⁷ Ikiyahatsa soho mytsaty mynakaraze ana humo hi kakurěta. Ahahumo kamypokzitsiarěta. Kytsa sakyriukrěnikitsa hurukwy bo zikoktyhyryknahaze, ziktsumuěhĩnaha katuktsa tsikyziknaha hỹ. Abaka sakyriukrěnikitsa hurukwy eze tsiktsumuěhĩkĩnaha. Iknakuruze Deus wasania ty ziwatawyky. Iharere zibetesaka ana humo hi kytsa iharere bo hyỹ nikaranaha sispirikporětsa niyziknaha. Ikiyahatsa kino niwatihi tsiktsumuěhĩkĩnaha. Iwatahi ahahumo kamypokzitsiarěta iwa wasani my hỹ. ⁸ Sesus Kiristu kahumo tsimypokzitsiarěta hỹ. Iwatahi utakta iwata my ahahumo kamypokzitsiarěta:

— Wasape my. Iwa Deus okzeka motsasoko ahahumo kamypokzitsiarěta hỹ. Ikiyahatsa humo ka kahyrikbarěta iwa Deus zikyrinmyryky — my.

⁹ Deus bo ahatsyhyryze ipe my:

— O myzo Sesus tuktsa Piripos ezektza ahumo simypokzitsirětsa. Iki humo hi myharape pokzitsikinaha. Asoho pinymyrytohinaha! Ba ziksimyiwu hawa myhyrinymyrywy baba humo sihyrinymyrytsa iwa tysitsumuěhĩkĩkta — my.

Iwa Deus bo ahatsyhyryze mopamykyso. ¹⁰ O Piripos ezektza hawa tsimykarana humo ahahyrinymyrytsa hawa wasani haty ahahyrinymyrytsa. Ba zikmyinaha. Nawa tsimyzurukunaha zeka Sesus myziksizoze batu ahasikpyby. Ahamysapyrětsa tsimoziknaha iwaze batu ahasikpyby. ¹¹ Iwa tsimyzurukunaha zeka wasania ty zuba

tsimykaranaha. Hawa wasani tsimykaranaha. Iwaze kytsa sizubarětsa ahahumo hi Deus bo motsasokonaha:

— O Deus ikia zuba tsamysapyrěta. Ikiya zuba wasani tsimykara — maha. Iwa ahahumo Deus bo mosakibazikik-naha.

Kabo ka Kiristu zuba mozihihik.

¹² O katukytsa hawa kytsa piksukyrykiknaha Sesus harere iktsasokoze, kytsa sizubarětsa humo wasani niyziknaha. Abaka kytsa sizubarětsa Sesus harere bo hyŷ mykaranaha iwatsahi ihumo sispirikporětsa moziknaha. Sinini ikykaraze Sesus harere bo hyŷ mykaranaha iwatahi kakurěta. ¹³ Ana kino sodadutsa pikperykynaha. Kytsa sizubarětsa kino niwatihi kasoho botu ziwabynaha. Uta kino sakyriukanikitsa hurukwy eze tu Sesus harere motsasoko ana hi ziwabynaha.

¹⁴ Iwaze katukytsa kabo iktsa mykaranahaze sakyriukanikitsa hurukwy eze tu sipunihikrětsa moziknaha. Deus hi nisiakuwyky iwatsahi Sesus harere bo hyŷ mykaranaha ihumo sispirikporětsa. Sipunihikrětsa tu nanabyitaba Sesus harere motsasokonaha. Sipybybyitsa mykaranaha Sesus harere motsasokonaha batu pyk zikaha.

¹⁵ Wastuhu zuba kytsa niharapepehakanahatsa humo Sesus soho motsasokonaha. Kahumo sizokdirětsa iwatsahi Deus wasania ty Sesus soho motsasokonaha. Ust-saktsa batu. Asahi simyzihikrětsa Deus harere siakparawy iwatsahi Deus wasania ty motsasokonaha. ¹⁶ Asahi kahumo simypokzitsirětsa iwatsahi Deus wasania ty motsasokonaha. Tubabatu Deus kape niy:

— Ahyriziktsokzawy humo wasania tytsaso. Myzubaha bokta! Kaharere wasania ty sibo tsiwatawykta! — niy. Iwatsahi asaktsa simyzihikrětsa katsyhyryze Deus wasania ty motsasokonaha. ¹⁷ Ustsaktsa batu. Sizokdirětsa tu

Sesus soho motsasokonaha, taha bo zuba mynakaranaha. Batu wasani zikaha. Asahi:

— Katsaksa Sesus soho motsasokonaha zeka katsa Pauro watsa tsimoziknaha. Iwaze kytsa mysoho “O asahi sihyrinymyrětsa maha” mytsaty ahabyitsa zikaha. O Pauro sakyriukanikitsa hurukwy eze mysoho ziwabyze iaku byita niyzik mytsaty ahabyitsa mykaranaha — nikananaha.

¹⁸ Wasaniha ty Sesus soho motsasonahaze anahumo hi kakurěta. Kytsa taha bo zuba mytsaty mykaranaha zeka Sesus soho motsasonahaze. Kytsa kino niwatihi simyzihikrětsa mykaranaha zeka Sesus soho motsasonaha iwatahi kakurěta mykara. Wasaniha ty Sesus soho motsasonahaze ana humo hi kakurěta mykara. ¹⁹ Iwatatu sakyriukrěnikitsa hurukwy eze tu kakurěta. Hawataeze piksukenaha ana humo hi kahyrinymyrěta. Ikiyahatsa kasyhyryze Deus bo tsimypamykysokonaha atahi pahawaby iwaze piksukenaha. Sesus Kiristu hyrikoso piktsumuěhĩ iwatahi piksukenaha anahumo hi kahyrinymyrěta.

²⁰ Kiristu tuk zuba mynakara ana hi mozihikik. Kamysapyrěta mynakara Kiristu kabo iktsa my zeka batu kasikpyby. Abaka Kiristu soho motsasokoze batu kapyby. Kapunihikrěta tu Deus wasaniha motsasoko. Iwaze kytsa hi:

— O Sesus Kiristu imysapyrěnikita hỹ — maha. Utakta kaspitu mopykyryk zeka yhỹ my. Kytsa pikbezenaha zeka niwatihi yhỹ my. Kiristu ihyrinymyryta babata harere mozihikik. ²¹ Uta kaspitu zeka Kiristu harere kytsa bo motsasoko. Kytsa Deus pe — O ikia zuba tsamysapyrěta — maha. Mohyrikosokda zeka uta Deus tuk kawahi mynapykyryk.

²² Uta kaspitohitu zeka kahyrikiztsokzawy humo tybyri zuba mynakara wasani my. Hawa ha ty ja myzihikik

batu kanyhy. Uta kaspitu mynapykyryk zeka hawa my. Kytsa pikbezenaha zeka wasani. Hawa ja mozi-hikik. Paikpa mytsaty mykara. Ske myparawy waha bo ikzumu. ²³ Mohyrikosokda tsihikik. Iwaze Kiristu tuk kawahi mynapykyryk. Iwatahi abaka pikbezenaha zeka wasi. ²⁴ Nawa tatu napykyryk zeka pahatsumuěhĩ iwaze ahahumo wasani. Iwatahi ahahumo mynapykyryk. ²⁵ Yhỹ ahatuk mynapykyryk iwaze pahatsumuěhĩ ana humo hi kahyrinymyrěta. Iwaze ikiahatsa Sesus harere bo hyỹ tsimykaranaha ihumo ahaspirikporětsa tsimozik-naha iwa pahatsumuěhĩ. Ahaspirikporětsa tsimoziknaha ana humo hi pahatsumuěhĩ iwaze ahakurětsa tsimozik-naha. ²⁶ Iwaze ahabo mynakozoreze ikiahatsa hi:

— O katsaktsa mykurětsa Sesus Kiristu zikwy Pauro mybo ziwatawy iwatsahi mykurětsa hỹ — tsimaha

Deus harere humo ahapunihkrětsaktsa!

²⁷ Kyze Sesus Kiristu harere bo hyỹ tsimaha ahaspirik-porětsaktsa! Iharere bo zuba hyỹ tahaktsa kytsa! Kyze ahabo mynakozore zeka, kaku zuba piwabyky. Ahabo zuk byizeka, kytsa ahasoho kabo motsasonaha:

— O Sesus tuktsa Piripos ezektsa wasani mykaranaha. Asaktsa atsa botu mytsaty mykaranaha. Iwaze Sesus harere bo tarabaja ziknakaranaha. Tyharape tsumuěhikĩnaha. Sesus harere bo hyỹ mykaranaha iwatsahi ihumo sispirikporětsa Deus wasaniha humo tarabajazu ziknakaranaha — mykaranaha. Iwa ahasoho ty mopamykysonaha. ²⁸ Ahapyby byihuja. Ahasukyrytsitsa pokso ahapyby byihuja. Ahapunihkrětsaktsa! Ahasukyrytsitsa ahabo iktsa maha zeka asahi sipybyrětsa moziknaha, Deus zikwy ahatuk zeka iktsa mahaze ana humo hi sipybyrětsa.

Ahapunihikrētsa tu Deus zikwy mysiwatawyky iwatsahi Deus wasaniha ba zikpykba sihyrinymyrētsa hỹ.

²⁹ Kyze Sesus Kiristu humo ahaspirikporētsa Deus pahahyrinymyryky ikiahatsa iharere bo hyỹ tsimykaranaha abaka itsyhyryze tsitsumuēhikīnaha. Nimywatawyhik ihumo ahaspirikporētsaze iwa itsyhyryze tsitsumuēhikīnaha. Ikiahatsa Kiristu tsyhyryze sinini tsimykaranahaze ana humo kino niwatihi nimywatawyhik iwa sitsumuēhikīnaha. ³⁰ Katsaktsa mykubyrisorokrētsa! Kytsa nimysininiwykynaha atsatu pahasininiwy botu iktsaso. Abaka tybyri zuba mykarazo ana hi tsiwabyanaha.

2

Kiristu wata tasopykzu.

¹ Abaka Kiristu zuba myzahapehaka iwatsahi ahapunihikrētsa tsimoziknaha. Kiristu ahahumo tsimypokzitsiarēta iwatsahi ba paikpa mytsaty zikaha. Ikiahatsa hi ihumo ahakurētsa. Deus hyrikoso ahatuk mynapykyryk. Iwaze tyharape pokzitsikinaha zikahabyitsa tu ahamysapyrētsa tsimoziknaha. ² Iwatahi ahape my:

— O kytsa batu ahasopyk iwatsahi ba zikarapepehanaha! Hawa Sesus mymypokzitsiki iwa ikiahatsa kino niwatihi tynaharape pokzitsikinaha! Parakbaha atsa botu mytsaty tsimykaranaha! Ikiahatsaktsa tsahamykpyriziurētsaktsa my — iwa tsimykaranaha zeka ahahumo kakurēta hỹ.

³ Ahabo ka mytsaty mytsaty byitaha! — Uta zuba kahyrinymyrēta — batu tyso. Asahi iwa mykaranaha zeka siharererētsa zuba. Ikiahatsaktsa tsahaspirikporētsa tsimahaktsa! Kytsa tuk ahakubyrisorokoktsa tsimaha. Ikiahatsa ustsasohi hi:

— O atakta tsimysapyrěta. Utakta batu — tsimaha. Iwa ustsasoho bo mytsaty tsimykaranaha. ⁴ Ustsasohosho bo mytsaty tysisakihikyknahaktsa. Batu ahasoho bo zuba mytsaty zikaha. Ustsasohosho bo mytsaty tysisakihikyknahaktsa.

⁵ Hawa Sesus Kiristu mytsaty ziknakara astsa botu tahaktsa isopyk watu tahaktsa! Hawa Sesus Kiristu nikara isopyk watu kytsa bo ahasopyksapyhu ja tsimykaranaha!

⁶ Atakta Deus wata ziknakara.

Sesus Kiristu Deus wata iwatatu tabo zuba mytsaty ahabyita nikara. Sesus Deus wata hi. — Utakta abazubata — iwa batu mytsaty nikara.

⁷ Atahi tazikwy zerekik. Atahi tsumuěhřtsa niyzik.

Atahi ihyriziktsokzawy humo ity huak ahabyita wata. Mybarawy ezekta niyzik maku babata.

⁸ Maku niyzikze Deus harere bo zuba hyě ziknakara. Kyze Deus nizihikik nahahumo nihyrikosokda iwa sinini nikara.

Kytsa iharapatawyhyta humo zihyrikiknahaze iwatatu Deus harere bo hyě ziknakara.

⁹ Iwatahi Deus okzeka Sesus myhyrizikwani niyzik.

Atahi:

— O Sesus imysapyrěnikita. Sesus wasani nikara. Ata zuba myhyrizikwani — niyzik.

¹⁰ Iwaze Sesus myhyrizikwani bijoikpe ezektsa bo piwatawy, mybarawy ezektsa bo kino niwatihi piwatawy,

siakbatsa sizubarětsa kino niwatihi bo piwatawyky iwa Sesus myhyrizikwani mysiwatawyky.

Iwatsahi tsezubaha iharere bo yhyě mykaranaha.

Sesus okeryk tahaekaratsa humo puruk puruk mykaranaha iwaze mypehakatsa mozik ziwatawykynaha.

¹¹ Kytsa sizubarětsa piwabynahaze asa hi:

— O Sesus zuba mypehakatsa. Atazuba mypehakatsa.
 Atahi wasani mykara. Atahi imysapyrēnikita —
 mykaranaha.
 Iwa motsasokonahaze Deus myzo bo mopamykysoziuku-
 naha hỹ.

Sesus tuktsa myzubaha bo Deus mysiwatawyky.

¹² Katukytsa wabyziutaha! Ahatuk ziknapykyrykze kaharere bo hyỹ ziknakaranaha hỹ. Abaka nokponi iksapy mynapykyryk atsawatu kaharere bo hyỹ tsimykarannahaktsa puětsik kaharere bo hyỹ tynakaranahaktsa. Hawa Kiristu mozihikik ana kino tsimykarannahaktsa kytsa! Iwa iharere bo ma tsimaha. ¹³ Hawa Kiristu mozihikik ana ty hi tsimykaranaha iwa Deus pahatsumuěhíkĩ. Iwatahi zikwy ty ahabo nyny my iwatsahi ihumo hawa Kiristu mozihikik atsatu tsimyzihikiknaha. Iwa Deus harere bo zuba yhỹ tsimykaranaha hỹ.

¹⁴ Hawa tsimykaranaha ahaharereharakyhyk byihuja. Ahahyriziktsokzawy tsimykarannahaze ahapepehaka byihuja. ¹⁵ Ahaharereharakyhyk byizeka Deus okzeka batu ahasikpyby. Wasani tsimykaranaha. Ikiahatsa Deus tyryktsa ahamysapyrětsa tsimoziknaha. Mybarawy ezektsa kytsa simyspihikbatarětsa mykaranaha. Asahi simysapybyitsa ziknakaranaha. Asatuk tsinapykyryknaha. Iki-ahatsa situkze byrisoiktsa hyrity watsa tsimaha. Hawa bijoikpe miwa eze byrisoiktsa natahahyrizikubannahaze amypubyri mozik. Iwata ikiahatsa wasani tsimykaranaha Deus harere tisapyrěna mysiwatawyky. ¹⁶ Deus harere mysihyrinymyrykynaha. Deus wasania ty iharere humo simysapyrětsa moziknaha ana humo hi mysiwatawyknaha. Iwa zeka kakurěta. Sesus Kiristu myziksizoze nawa puruze Sesus kytsa soho motsaso:

— O atahi wasani mykara. Usta bo atakta batu. Batu wasani mykara — my. Nawa puruze Sesus myziksizoze ikiahatsa iharere bo hỹ tsimykaranaha iwaze ahahumo kakurēta. Hawa tsikykaranaha kahyriziktsokzaharēta mykara ahatsyhyryze wasani ikykara, kahyriziktsokzawy ahatsyhyryze kasokpykziurēta mykara iwa tsahahyrinymyrētsa.

¹⁷ Pikbezenaha zeka ja. Tubabatu kytsa hozipyrykzatsa nisibanahaze Deus bo nyny ziknakaranaha. Pikbezenaha zeka utakta hozipyrykza zikziwezokonaha nawata mozik. Deus bo uta tu piknyny. Ikiahatsa kino niwatihi ahaspirikporētsa babatsa zeka anaty hi Deus bo nyny tsimaha. Hozipyrykza hyrity wata. Ikiahatsa Deus harere bo hỹ tsimykaranaha iwaze ihumo tsimyspirikpokonahaze ana ty hi Deus bo nyny tsimaha. Kytsa pikbezenaha zeka kakurēta my. Ikiahatsa kino niwatihi katuk ahakurētsa tsimykaranaha iwaze uta kino pahakusukni. ¹⁸ Ahakurētsaktsa! Tsahakurētsa zeka uta kino niwatihi kakurēta my.

Timoteo Epaporodito ahatsa sisoho motsasoko.

¹⁹ Mypehakatsa Sesus yh̃ myzeka Timoteo ahabo myzipeha. Iwa mytsaty mykara. Hawaze ahasoho piwaby zeka kakurēta mozik. Ahasoho piwaby zeka batu paikpa mytsaty mykara. ²⁰ Atakta kawata pahatsumuēhī tsihikik. Katukytsa tuk zeka atahi zuba ahahumo tsimypokzit-siukrēta h̃. ²¹ Utsa katukytsa taha bo zuba mytsaty mykaranaha. Sesus Kiristu pitsumuēhīnaha zeka batu mytsaty zikaha. Timoteo batu. Atahi Sesus harere bo zuba hỹ mynakara.

²² Hawa nikara ana hi botu tsahahyrinymyrētsa. Isapyhanikia ty zuba ziknakara. Katuk tarabaja ziknakara. Hawa itse tazo tuk tarabajziu nikara

iwata atakta katuk tarabaja nikara. Katsaktsa Deus wasania ty kytsa sizubarētsa bo tsiktsasokonaha iwaze kytsa Sesus harere bo zuba hỹ nikananaha iwatsahi ihumo sispirikporētsa moziknaha, iwa tarabajaziu tsikykaranaha. ²³ Atakta ahabo myzipeha. Tapara hawa ja my mykara kahyrinymyrēta iwaze uta ahabo myzipeha. ²⁴ Uta kino ahabo mynakozore tsihikik. Mypehakatsa yh̃ my zeka abanurytu ahabo mynakozore. Iwa mytsaty mykara.

²⁵ Kyze mytsy Epaporodito ahabo myzipeha. Atakta katukta my katsa petoktsa tsikyzi knaha Deus wasania ty tsiktsasokonaha h̃y. Mykubyrisorokrētsa tsikykaranaha. Atahi ahasapyzky kabo tsikzipehanaha tahi ziktsumuēh̃ikī. ²⁶ Atakta ahahumo tsihyrizikbarēta. Tsimyitsapyrēta niyzik anasoho tsiwabynaha. Tisukatsihikrēta nikara paikpa mytsaty mytsaty nikara.

²⁷ Ata kino tsimyitsapyrēta asiba nira Deus ihumo zipokzitsiki iwaze zizororowy. Mohyrikosokda zeka kasukatsihikrēta mozik. ²⁸ Iwatahi aidy ahabo myzipeha tsihikik. Ibo iktsa tsimahaze ahakurētsa. Ahahumo hi uta niwatihi abaka batu kasukatsihik.

²⁹ Myzumuze ihumo ahakurētsaktsa kytsa! Sesus tuktsa tyharape kusuknikinaha! Kytsa tahawatu simyhyrizikwynikitsa mozikanaha. Hawa Epaporodito nikara. Kytsa isoho — O atahi tsimysapyrēta — maha. Ahasopyksapyhu ja! ³⁰ Atakta Kiristu nizihikik naha humo hi asiba nihyrikosokda. Nimytsumuēh̃ize Kiristu humo asiba nira. Iwa ahatsyhyryze nikara. Ikiatsa zikahabara iwatahi ahasapyzky niyzik.

3

Hawa Deus okzeka wasani my.

¹ O katukytsa nepykykze ahape my:

— Mypehakatsa Sesus humo ahakurētsaktsa! tsimaha — my, ana hi mozihikik. Kyze kapehawy botu iktsaso ahabo iwatahakazo. Kapehawy humo pahatsumuēhī iwatahi batu kasikpyby, kapehawy humo ahabo piwatahazo:

² — O kytsa pykyhytutaha! Kytsa simysapybyikitsa humo pahaspihikbata tsihikiknaha. Sakmyitsa simysapybyitsa mykaranaha. Utsa kytsa nisipiakzyzykynaha iwaze Deus okzeka simysapyrētsa mytsaty ahabyitsa mykaranaha. — ³ Katsaktsa Deus tyryktsa babatsa tsimaha. Tubabatu Moises harere hi:

— O kytsa tsikapiakzyzyknahaktsa iwaze iwatahata niyzik Deus tyryktsa kytsa bo tsiwatawynaha — niy. Ana kino mytsaty mykaranaha. Katsaktsa batu. Abaka katsaktsa usts a kytsa bo mysipokzitsikinaha iwaze katsaktsa Deus tyryktsa tsiwatawykynaha. Deus hyrikoso mymysumuēhī iwatsahi Deus bo tsimysakibazikiknaha:

— O Deus myzo ikia zuba wasani tsimy kara. Ikia zuba tsamysapyrēta. Ikia humo ka mykurētsa hỹ — tsimykarana. Deus hyrikoso humo, katsaktsa mykurētsa, Sesus Kiristu sopykwy humo tsimykarana. Iwaze kytsa sinury humo nisipiakzyzykynahaze ana humo hi batu sispirikpo. Sisopykwy humo batu sispirikpo. Sesus sopyk ty zuba tsimykarana haze katsa Deus tyryktsa tsimoziknaha ana hi tsiwatawynaha.

⁴ Katsaktsa Deus okzeka mymysapyrētsa tsimoziknaha. Taparaktsa sopykwy ty zuba batu hỹ tsimykarana, sihumo batu mospirikpo. Kytsa Deus okzeka simysapyrētsa mypehakatsa harere bo hyỹ mykaranaha iwa zeka utakta motsasotohi. Aty zipiakzykik zeka wasani mytsaty my zeka utakta wasani tohi mytsaty mykara.

⁵ Utakta kapurukwy zumuze, estuba tsyhyryze ipykze kytsa zikpiakzyzykiknaha. Utakta Isareu ezekta my. Ka-

zotsa Sudeutsa niaha. Utakta Běsami tukytsa. Kazotsa Ebereutsa niaha iwa taypyk. Utakta Pariseutsa Moises harere bo yhỹ ziknakara. ⁶ Hawa wasani my ana hi mozihikik. Sesus tuktsa iksisukyrykik ana kino wasani mytsaty ahabyita ikykara. Moises harere bo yhỹ ikykara. Batu aty tohi kasoho ziktsaso:

— Atakta Moises harere bo batu hỹ nikara — niaha. Moises harere humo yhỹ ikykara iwaze Deus okzeka kamysapyrěta mozik mytsaty ahabyita ikykara.

⁷ Abaka batu. Mektatu Sesus harere bo zuba yhỹ mynakara. Hawa wasani mykara mytsaty ahabyita ikykara abaka batu mysapy kahyrinymyrěta my. Iwatahi kazotsa sopykwy iksimoewybaik. Tapara taparaktsa sopykwy humo kakparawy. Abaka mahani, sisopykwy humo batu kakparawy.

⁸ Sisopyk tsizubarěna botu imoewybaik. Abaka isapyrěnikia zuba mozihikik. Kiristu zuba mozihikik ana kino tisapyrěna atahi kapehakatsa mozik, iharere bo zuba hyỹ mykara ana hi mozihikik iwa Sesus tuk mozuruku. Hawa ikykara naha ykpyri wa. Kytsa ykpyri pipaparakanaha atsawatu ustsapykwy humo imoewybaik. Iwatahi Kiristu tukta babata mozihikik.

⁹ Sesus tuk mynapykyryk. Utakta Sesus tuk atsatu mytsaty tsimykaranaha. Atahi amy ty tisapyrěna ty kabo nyny niy. Tisapyrěna ty kabo nyny niyze batu Moises harere ibyky humo yhỹ iky. Tisapyrěna ty kabo nyny niyze, Sesus harere bo hyỹ mykara iwatahi ihumo kaspirikporěta ikyzik. Iwa. Kiristu inahyryzikpo utakta niwatihi abaka ituk mynapykyryk.

¹⁰ Iwaze Kiristu harere bo hyỹ mykara ihumo mospirikpoziu zeka ituk mozuruku. Iwa Kiristu tuk mozuruku. Hawa Kiristu sinini nikara utakta niwatihi iharere bo hyỹ mykara zeka moziksukyrykynaha. Iwa Kiristu

wata mozik. Kiristu myhumo tsimypokzitsiarěta iwatahi kytsa mysapyzeken zibezenaha. Katsa iwa tsimoziknaha batu mybo zuba mytsaty tsimykaranaha. ¹¹ Iwatahi Deus mozikyryzikpowy ana hi taperyky, iwaze ituk kawahi mynapykyryk.

Katsa Deus ske buruk tsimykurunahaze kytsa motururukunahaze tapara zumuta wata tsimaha.

¹² O kytsa batu tyso:

— O uta botu kamsapyrěta ikyzik tsizubarěna inymyrybaik. Sesus harere bo hyŷ mykara iwatahi kaspirikporěta ikyzik iwatahi batu kahyrinymyry tsihik — my. Iwa batu tyso. Utakta tarabajaziu mykara iwaze Deus okzeka kamsapyrěta mozik iwatahi kapaikrěta tarabajaziu mykara. Batu kakubyri zikzumu. Ana humo hi Kiristu zikwatawyhik. Itukta ziknyhik, iwatahi kaspirikporěta babata mozik ana humo hi mynakara hŷ, tybyri zuba mykara. ¹³ O katukytsa batu mytsaty mykara:

— O utakta botu ikspirikpo baba — my. Iwa batu kapetu kasopyk. Hawa isapyrěnikia batu epyk. Nawaha ty ikykara naha ikspiriktsokda. Abaka hawa isapyhanikia ty ana ty zuba mykara. Kaspirikporěta ikyzik ana hi mozihihik. ¹⁴ Kytsa motururukunahaze. Ata para pomota itypyhanikita my. Ata hi batu tasukpe bo iktsa ziky. Batu paikpa iktsa ziky. Utakta iwata my. Deus Sesus Kiristu humo zikwatawyhik, ituk kawahi mynapykyryk, meky watu mozik ana hi piperyky hŷ.

¹⁵ Iwatsahi katsaktsa Sesus Kiristu harere bo hyŷ tsimykaranaha ihumo myspirikporětsa hŷ iwatsahi mytsaty tahaktsa! Aty mektatu mytsaty my zeka Deus anahumo pahahyrinymyry. Nawaha ty wasani my Deus hi pahahyrinymyry. ¹⁶ Hawa Kiristu sopyk humo yhŷ tsikykaranaha atsatu iharere bo hyŷ tahaktsa kytsa!

¹⁷ — O katukytsa! Hawa ahatuk zikzurukuze kasopyk watujataha tsimykaranaha. Utsa kytsa asaktsa kawatsa mozurukunaha sibo iktsaziu tsimykaranaha. Hawa mykaranahaze ahasopykzukupksa tsimykaranaha! — my ¹⁸ Hawa ha ahabo motsasoko botu iktsaso. Tsizubarēna iktsasoko abaka ahabo motsasokozo. Kytsa sizubarētsa hawa mozurukunaha Kiristu sukyrytsitsa moziknaha, iwatahi kasukatsihikrēta. Hawa mozurukunahaze Kiristu sisapyzesty harapatawyhyta humo nihyrikosokdaze nispiritsokdanaha. ¹⁹ Asaktsa Deus sinini ykarawy bo mysipehahik. Deus harere bo batu hỹ zikaha, hawa myzehikiknaha ana humo kino mytsaty mynakaranaha. Sisikpybyyikitsa:

— O kytsa mysopyk bo iktsa tahaktsa — maha. Sisikpybyyitsa tu taha bo zuba sisopyk iwatsahi astsatu mykaranaha.

²⁰ Katsaktsa batu tsimaha. Memywatu tsimoziknaha. Sesus Kiristu humo myspirikporētsa iwaze bijoikpe mysapy baba my. Myhudikhudikwy tsimyzurukunahaze mysapy baba eze taperykynaha. Sesus Kiristu Deus bo mymyoktyhyrykta taperyky. Atahi bijoikpe ikny myziksizo. Mynasikzoze mybarawy bozo atahi taperyky. ²¹ Myziksizoze mynury ezytyk ty mybo nyny my. Abaka mynury humo mykubyrizumu. Mymyitsapyrētsa tsikyzyknaha. Mynury mohyrikosokda. Iwaze Sesus mekta tu mynury ty mybo nyny my. Tsimyharabokzonaha. Mynury ezytyk mozikzo Sesus nury wata maha. Inury tisapyrēta hỹ. Sesus Kiristu tsipunihikrēta. Hawa tohi zikaha ba. Izikwy humo mynury huak ty iwaze izikwy humo mekta tu nury ty ezytyk mybo nyny my hỹ, ezytyk zuba mynury mozik. Hawa tohi zikykbannahabyitsa.

4

Mypehawy ahabo my.

¹ O katukytsa ahahumo kamypokzitsiukrēta. Ahahumo kahyrizikbarēta. Tsipikykusuknikinaha. Ahahumo kakurēta ahasoho kytsa bo motsasoko. Uta hi:

— O Piripos ezektsa humo kakurēta. Sesus tuktsa humo kakurēta hỹ — mykara. Iwa ziknakara. — O kytsa hawa Sesus sopyk tsimykaranaha ana humo kino ahakubyrisorokrētsaktsa tsimaha — my.

² Kyze utakta:

— O wytykyryk Eudia, Sītike ahaza wabytoktotahatsa! Tyharape pokzitsinahaktsa! Ikiahaka ahaturkytsa Sesus Kiristu humo ahaspirikporēza iwazahi Sesus harere bo yhỹ tahaktsa! — mykara. ³ — Ikia Sizikus katukta mynasitsumuēhĩ. Wytykyryk petoku asizahi myharape betsakaknahaze tysitsumuēhĩkta — my.

Tubatu asizahi katuk tarabajaziu nikaranaha. Deus wasani haty sizubarētsa bo nitsasokonaha. Keremente kino niwatihi ustsya mytuktsa Deus wasania ty kytsa sizubarētsa bo nitsasokonaha. Katsumuēhĩtsitsa Deus tsyhyryze tarabaja nikaranaha sinaro botu ziwatahaba. Bijoikpe eze Deus nisiny papeu humo sinaro ziwatahabaik, Sesus humo meky watu niyziknaha.

Ikiahatsa mytsaty mytsa byitaha Deus bo tsimypamykysokonaha.

⁴ — O katukytsa Sesus tuk tsinapykyryknahaze ahaku tsiwabykynaha! Ahape myzo. Ahaku tsiwabykyzonaha! — my. ⁵ Sizubarētsa tysipokzitsinaha ahakubyrisoroku ja. Sesus atsoko myziksizo ana bo hi mytsaty tahaktsa. ⁶ Batu paikpa mytsaty tsimykaranaha. Batu ahape tu ahasopyk:

— O Deus myzo kahumo pipokzitsi ja. Batu kanyhy — tsimaha. Iwa batu tyso. Ikiahatsa hi Deus bo tsimypamykysokonaha, amy humo ahakubyri ibo tsimyza-pykykynaha. Ikiahatsa hi:

— O Deus myzo amy humo pikykubyri eze ka abo myzapykyky. Hawa ha myzehikik zeka kabo nyny tsimy iwatahi kakurēta mykara — tsimaha. ⁷ Iwa zeka mytsaty mytsaty byitaha, Deus pahapunihikwyky myzubaha ana humo kino batu sihyrinymyry ziwabykynaha zuba. Sesus tuk tsinapykyryknaaha zeka mekywatsa tu tsimoziknaha. Ahamysapyrētsa tsimoziknaha. Hawa tsimykaranaaha zeka mytsaty mytsaty byitaha tsimaha, Deus hi ahapokz-itsikitsa my ana humo hi ahahyrinymyrētsa. Iwatsahi ihumo ahakurētsa.

⁸ Pykyhytutahaktsa! Hawa mytsaty tsimykaranaaha ana humo hi pykyhytutaha. Amy wasani zuba mytsatyziutaha! Kytsa pipokzitsikinahaze ana humo hi mytsatyziutaha! Isapyrēnikia bo mytsatyziutaha! Iwa mytsatyziutaha. Wasaniha bo wabyziutaha ana humo hi kytsa sakurētsa moziknaha ana bo hi mytsatyziutaha. Deus okzeka, kytsa okze kino niwatihi wasani my. Sizubarētsa bo wasani my. Iwa ana bo kino mytsatyziutahaktsa. Iwa tsizurēna. Batu tymyi. Tisapyrēna iwa ana bo kino mytsatyziutahaktsa! Tsizubarēna humo kino ahasikpyby byihuja ana bo hi mytsatyziutahaktsa kytsa! ⁹ Kaharere bo yh̄y tynakaranahaktsa! Nawa ha ty ahahyrinymyryky naha ty tynakaranahaktsa! Hawa mozuruku ikiahatsa tihiktsa! Kaharere tsizubarēna bo hȳy tahaktsa! Iwaze Sesus mymykusukniki ahapaok baze tu mynapykyryk.

Pauro Piripos ezektsa humo tsakurēta.

¹⁰ Abaka tsiktsumuēhizonaha. Tapara tsiktsumuēhiknaha. Iwaze tsepyknaaha. Tsihokdahaarēna

tu tsepynkaha. Ikiyahatsa kahumo tsahamypokzitsirětsa ana humo kino kahyrinymyrěta. Abazuba kahumo ahamypokzitsiukrětsa tsipiwatawyzonaha. Utakta Sesus tuk mynakara kakurěta, ikiahatsa tsipiktsumuěhĩnahaze niwatihi kakurěta mykara.

¹¹ Batu kasopyk:

— O kanamy nepykta tu batu kasopyk. Kanamybyita tu wasani my. Kanamyrěta mykara zikino wasani my, iwaha tu yhy — mykara. ¹² Utakta kanamy tsikaeni iwaha humo tu kakurěta. Kanamy tsizubarěna ana humo kino kakurěta. Hawa mozuruku wasani my. Hawa mykara iky niwatihi kabo wasani mykara. Kasorokrěta zeka wasani my. Karaparěta kino niwatihi wasani mykara. Kanamyrěta zeka wasani mykara, kanamybyita zikino niwatihi wasani mykara. ¹³ Hawa kahumo mykara ana humo hi kapunihikrěta mozik. Iwaze Sesus humo kaspirikporěta ikzyk. Kiristu humo hi pikpunihikwyky iwatahi kakurěta mozik. Izikwy humo ba hawa tohi zikaha. Iwatahi kapunihikrěta mozik.

¹⁴ Iwaze tsiktsumuěhĩnahaze wasani tsimykarana. Kytsa zikykniknahaze batu katy arek iwaze tsikpokzitsikinaha. ¹⁵ Ikiyahatsa Piripos ezektsa zuba tsiktsumuěhĩnaha. Masedonia ikny iknaparakze ikiahatsa zuba tsiktsumuěhĩkĩnaha. Anaeze tuze Deus wasania ty ykbata zuba ikyze iktsasoko kyze kino tsiktsumuěhĩkĩnaha. Ikiyahatsa zuba okyrysaro ty kabo nyny tsikaha.

¹⁶ Utakta Tesaronika eze tuze kanamy nepyk hana bo ja. Anaeze ahanamy kabo tsibiakaknaha. Tsizubarěna okyrysaro ty kabo nyny tsikaha. ¹⁷ Ahanamy humo ka batu kamyzehik. Deus isapyrěnikia ty ahabo nyny my anahi mozihihik. ¹⁸ Nawa ha ty ikiahatsa kabo nyny tsikaha Epaporodito zebykyryk. Tsizubarěna ty kabo

nyny tsikaha. Abaka piwatahaka utakta ahanamy humo kakurēta iwaze kakurēta hỹ. Iwatahi batu kakubyri. Isapyrēnikia ty topyririk koro tosikwaka. Deus ana okmorē pioksaze ana humo hi tsakurēta. Pahapokzitsiki hỹ. Ahanamy ustsas Sesus tuktsa bo nyny tsimykaranaha zeka atahi tsakurēta hỹ. Hawa tsikykaranaha topyririk koro tosikwaka. ¹⁹ Amy humo ahakubyri zeka anatyhi Deus ahabo nyny my. Ikiahatsa Sesus tuk tsimykaranaha. Atahi tsinamyreta hiba iwatahi amy humo ahaku byri zeka ahabo nyny my atahi imysakihikyrenikita my. ²⁰ Iwatahi Deus koikny baktatu ipe my:

— O Deus myzo ikia zuba tsahyryzikporēta. Ikia zuba amysapyrēnikita tsimy — my. Iwa hỹ.

Abaka asiba nepyk kytsa bo mytsaty mykara.

²¹ Kyze Sesus tuktsa sizubarēta ahahumo sihyryzikbarēta. Katukytsa katuk ahahumo sihyryzikbarēta. ²² Sesus tuktsa katuktsa ahahumo sihyryzikbarēta. Asaktsa sipihakatsa myhyryzikwanikita humo tarabajaziu mykaranaha asahi ahahumo sihyryzikbarēta mykaranaha.

Deus pahasapywyky.

²³ Iwaze utakta ahatsyhyryze Deus bo mopamykysoko: — O Deus myzo Sesus tuktsa Piripos ezektsa tysisakihikykta! Mypihakatsa Sesus Kiristu tysipokzitsikikta! — mykara. Niwazuba. De.

Pauro

Deus Harere Aibaky Sesus mymyspirikpoko naha New Testament in Rikbaktsa (BR:rkb:Rikbaktsa)

copyright © 2011 Wycliffe Bible Translators, Inc.

Language: Rikbaktsa

Translation by: Wycliffe Bible Translators, Inc.

Rikbaktsa [rkb], Brazil

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Rikbaktsa

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

PDF generated using Haiola and XeLaTeX on 9 Sep 2021 from source files dated 9 Sep 2021

2f0260ea-5969-5180-9ac5-183d63a989f1